

Regional News Unit AIR Aizawl

Friday, October 06, 2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Social Welfare, Tribal Affairs, Women & Child Development Department Minister Lalrinawma an nimin khan Kelsih-ah Tribal Research Institute (TRI) a hawng.**
- **Agriculture Minister Pu C.Lalrinsangan Lengpui Vengtharah State Biological Control Laboratory, Mizoram Sawrkar leh NABARD tangkawp sum cheng nuai 273 senga din chu nimin khan a hawng.**
- **Champhai-ah zirlaite leh thalaite an hmalam hun kawhhmuhna leh hna hrang hrang chungchang inzirtirna hunpui – ‘Champhai Rahbi’ huaihawt mek a ni.**
- **FOCUS hnuai-ah Aizawl pawn lam Dist 6 aṭangin mi 23 ten Lucknow Kel vulh zirna hmunpui an tlawh mek.**

<><><>

TRIBAL RESEARCH INSTITUTE

Social Welfare, Tribal Affairs, Women & Child Development Department Minister Lalrinawma an nimin khan Kelsih-ah Tribal Research Institute (TRI) a hawng.

Minister chuan khawvel changkanna kal zelah hnam nunphung leh ziarang te zawi zawiin thildangin a rawn thlak mek a. Research Institute chu hnam chin dan vawnnun zel nan leh inzirna hmun ni turin a tangkai hle dawn a, hnam tenau zawk chimral an nih loh nan hnam tan thil ropui tak a nih a beisei thu a sawi. Mizoten mahni hnam an ngaihsan a hun takzet tih sawiin hnam tha, hnam huaisen, rinawm leh taima hnam an ni tih chu rilru-ah nghet taka pawm turin thalaite chu a chah bawk.

Tribal Research Institute ah hian Zawlbuk, Exhibition Library leh Auditorium, Mizo Lal In (Administrative Building), Conference Hall-te a awm a ni. Mi 50 ve ve lenna mipa leh hmeichhe Dormitory awmin VIP Cottage 4 a awm a bawk a. Workshop cum Training Centre a awm bawk dawn a. Ladeh, Hnanghlai, Puantah leh hnam thil inzirna hmunpui a ni dawn a, Synthetic thatch (Artificial di) kangmei laka him, USA atanga chah luh hmangin a chung hi khuh vek a ni a, a chhuat leh a building bangte hi mau dap ziarang customised glaze tile leh wall paper bel vek a ni.

He hunah hian Mizo lemziak, Mizoram Indigenous Association-te atangin infiamna bakah themthiamna chi hrang hrang entirna hun neih nghal a ni.

<><><>

AGRICULTURE MINISTER

Agriculture Minister Pu C.Lalrinsangan Lengpui Vengtharah State Biological Control Laboratory, Mizoram Sawrkar leh NABARD tangkawp sum cheng nuai 273 senga din chu nimin khan a hawng.

Agriculture Minister Pu C.Lalrinsanga chuan hlotur hmanga thlai eichhetu tihrem tuma hmalaknain hriselna kawngah nghawng thalo tak a thlen thin thu sawiin, mihring hriselna tura him zawk thlai eichhetu rannungte eichhe let vetu siam chhuahna tur, State Biological Control Laboratory, Lengpui Vengthara hawn a ni chu Mizoram tana mellung pawimawh tak a ni, a ti a.

Kum 2019 a Fall Armyworm (FAW) pangang puangin nasa taka Mizoram puma Vaimim chin a nghawng thu sawiin, hemi doletna kalzela pangang thahna Biological Control Agent tangkai zia hriatchhuah belh a nih hnuah ICAR-NBAIR, Bengaluru nena thawhhona hnuaiah State Biological Control Laboratory hi din a lo ni ta a ni, a ti a. A puitlin theih nana ICAR-NBAIR Bengaluru, Department thawktute leh khawtlang hruaitute thahnemngaihna fakawm tiin, Laboratory tihchangtlun leh enkawl kawngah lungrual taka thawhho zel a beisei thu a sawi bawk.

Pu C.Lalrinsanga chuan ei leh in kaltlanga taksa tichhe theitu hrang hrangte ven kawngah hmalak mek zel a nih thu sawiin, Biological Control Laboratory hawn thar chuan thlai enkawlna kawngah leh ei leh bar hrisel thar chhuah kawngah awmze thui tak a nei dawn a ni, a ti a. Kuthnathawktute thlengpha tur biocontrol agent dukhawp siam chhuah a nih theih hunah chuan hlotur hman pawh tihlem tial tial beisei a nih thu a sawi a. A hmaa biocontrol agent 3 dawn tawh bakah bio-control agent 7 dang ICAR-NBAIR, Bengaluru atanga dawn a ni leh chu lawmawm a tih thu sawiin, hengte hi Laboratory-ah hian tihpun a ni dawn a, thlai eichhetu rannung hrang hrangte thah nan tangkai taka hman tum a ni, a ti bawk.

<><><>

ZPM PRESS CONF

Zoram Nationalist Party ZPM Thalai chuan MNF sawrkâr hnuaiah SASCI hnuaiah hnathawh a chhe hle tih sawiin chhui chiang turin Lok Ayukta-ah thubuai an thehltut tawh an ti a, tunhnaia SASCI hna an pek chhuah te chu uluk takin an vil zui zel dawn an ti.

ZPM Thalai Vice President Zoramchhana Sailo chuan SASCI hmanga hnathawh lo awm tawh te chu an enfiah na ah a tha tawklo hle a ti a, tun hnaiah hna pek chhuah tam tak a awm tih sawiin heng te hi an vil zui reng dawn a ti a, SASCI hmanga hnathawh tha lo leh kalphung dik lo a awm a nih phawt chuan a mawhphurtute'n rorelna dik tak an chan theihna turin ZPM Thalai chuan a tawp thlengin hma a la zel dawn tih a sawi.

Vice President chuan SASCI chu hmasawna ruhrel tha leh rotling siamna tur atâna leh, nakina sum siam chhuak thei tur hmasawna din a nihna tura Central sorkarin a ruahman a ni a ti a, duhsak zawng sum insiamna leh vote zawn nana MNF in an hmang chu pawl an ti takzet tih an sawi bawk.

<><><>

KOLASIB WILDLIFE WEEK

‘Nungcha humhalhna kawnga thawhhona’ tih thupui hmangin National Wildlife Week vawi 69na chu nimin khan Kolasib ah hman a ni a, Kolasib District Bawrhsap Pu John LT Sanga leh Principal Secretary & Principal Chief Conservator of Forests (Retired) Pu Lalram Thanga ten an hmanpui.

Pu John LT Sanga chuan, Thing leh mau, nungcha tinrengte duat taka enkawl chu Pathianin mihringte mawhphurhnaa a dah a a, mihringte'n nungchate an tihnat a thiang lo tiin, boruak tha siamtu thing leh mau, leh nungchate hi mihringte tel lova an awm theih laiin mihringte zawk hi an tel lovin an awm thei lo thung a, an chereu mai loh nana ven him chu mitin te a ni, a ti.

Pu Lalram Thanga chuan Mizoram hian ramngaw (-ah hausakna inphum ru tam tak a nei a, a hlutna hriat leh humhalh kawngah pawh tun hma ai chuan nasa takin hma a sawn a ni, a ti a. Nungcha humhalh kawngah sawrkar leh a kaihnawih pawl bil te'n theih tawp chhuahin hma la mah se, ramvaka sa pel duh tawk an la awm chung chuan hma lakna a sawt mawhin, nungchate'n chereu lam an pan deuh deuh zel a ni a ti a, ramngaw leh nungcha humhalh hi forest department tih tur chauh a ni lo va, khua leh tui tha tih tur a ni, a ti.

He hunah hian sawrkar official-te, Govt Kolasib College, Govt C. Zakhuma Higher Secondary School leh St John's Higher Secondary School zirlai naupangte, tlawmngai pawl ai awhte leh chanchinbu mite an tel a ni.

National Wildlife Week, 2023 hi October ni 2 atanga October ni 8 inkar chhunga hman tur a ni a. India Hnam Pa Mahatma Gandhi pian champha phak pualin India ram pumah kum tin hman thin a ni.

<><><>

KMMTTP

Kumin August ni 1 atanga zangnadawmna ngiata Sorkar nawr nan Kaladan Multi Modal Transit Transport Project (KMMTTP) ram neitu intelkhawm ten Dy.Conservator of Forest Office an dan chu an la chhunzawm zel a, sawrkar atangin thu lawmawm an la dawnglo tih an sawi.

Lawngtlai District Land Owners Association te hian KMMTTP a hnathawktute chet chhuah pawh remti lovin hun engemaw chen KMMTTP kawngpui pawh zawh hleihtheih lohin a awm a, Sorkar thuneitute leh mipui lam dinhmun en chungin thla hmasa September 2 atang khan KMMTTP kawngah hnathawktute chet chhuah an rem ti a, vawiin thlenga zangnadawmna an ngiatna ah thu lawmawm an hriatloh vangin tun thla 10 thleng ngaihchan leh phawt nise an ti a, zangnadawmna an la hmulo emaw, inngah ngamna tur an hrelo a nih chuan KMMTTP a an ram chin humhalh nan hmalak zui nise tiin Ramneitu intelkhawm te chuan an rel.

Puan tawh thin angin KMMTTP a zangnadawmna ngiat te zingah Gauhati High Court Aizawl Bench in ram pass dik tak tia a finfiah mi 138 te chuan kawng hrang hrangin hma an la tawh a, an duhthusam erawh vawiin thlengin a la puitling theilo chu hriatthiam har an tih thu an sawi.

<><><>

CHAMPHAI RAHBI

Champhai zirlaite leh thalaite an hmalam hun kawhhmuhna leh hna hrang hrang chungchang inzirtirna hunpui – ‘Champhai Rahbi – Career Expo & Job Fair’ chu nimin khan Government Champhai College Multipurpose Hall-ah Champhai DC Pu James Lalrinchhana’n a hawng.

Champhai Rahbi hi vawiina neih chhunzawm tur a ni a. Government Champhai College Multipurpose Hall bulah hmun ruahman a ni a. Hotel Management, Nursing, Bestway Network Marketing, Bank hrang hrang, LIC, Mission Foundation Movement, Jay Jay Training & Placement, Suzuki leh Hotel ten stall an siam a. Heng stall-ah te hian hna hrang hrang chungchang inzirtirna leh kawng kawhhmuh mai bakah hna lak leh placement thlengin an ti thei a. Foreign lama hnathawk duh tan te pawh foreign placement thlengin an tanpui thei a. Zirlaite mai bakah Champhai District-a thalai hna zawng mekte leh hetiang lam ngaihven duh te tan naktuk tlai dar 5 thleng pan theih a ni.

<><><>

FOCUS

FOCUS hnuaiiah Aizawl pawn lam Dist 6 ațangin mi 23 ten Lucknow Kel vulh zirna hmunpui an tlawh mek.

Serchhip, Champhai, Kolasib, Mamit leh Saitual Dist ațangin kel vulhtu mi 4 theuh leh Khawzawl Dist ațangin mi 3 bakah anmahni hruaitu mi 2 te nen an vaiin mi 25 ten training neih pahin Uttar Pradesh Lucknow khawpui dai fema Kel vulh zirtirna hmunpui Rasoolpur ami The Goat Trust Cente, International Institute of Goat Management hi, kuthnathawkte chawikanna scheme chi khat- Fostering Climate Resillient Upland Farming System (FOCUS) bul tumin an tlawh mek a.

Heng mite hi Boar Semen Station Manager pahnih- Dr Vanlalhriatpuia Kolasib leh Dr H.Beirohly Serchhip a mi ten hruaiin tun thla ni 3 khan Lengpui chhuahsanin, nimin training an țan a. vawiin hian Lucknow ațanga Kilometre 90 vela hlaa Kel vulhna hmun leh a chaw siamna hmun an tlawh ang a, naktuk tlai hian training hi an zo fel dawn a.

Kel vulh training Lucknow a neihah hian The Goat trust mithiam Rajat Singh, Ram Jeevan leh Sanjeev Kumar ten zirtirna an pe a. Mizorama ațanga Kel vulh training zir mek te hian Kel enkawl dan țha leh awlsam, hnim damdawi hman țangkai dan te, hlawk zawk leh țha zawka Kel vulh dan thar te an hre chhuak bakah, a chaw leina atana Vawk leh Bawng vulh aia senso tlem zawk a nih dan te an hre thar chu an phur phah hle tih an sawi a ni.

<><><>

AKASHVANI INTVW

Akashvani Aizawl, Regional News Unit in district thar 3- Saitual, Hnathial leh Khawzawl bakah Aizawl Dist-a Part Time Corresspondent a lak tura diltute interview hun atan karleh thawhtanni Oct ni 9 khi ruat a ni a, Tuikhuahtlanga Akashvani Stationah chawhma dar 10 ah kim vek tur a ni a, document pawimawh zawng zawng endik tura ken tur a ni bawk a ni.

<><><>